



Jumat, 07 Oktober 2022
Ogen: Daniel 4:1-18



Nipi Nebukadneser



Nina tua-tua 'nipi e me bunga-bunga paksa tunduh.' Amin maun gejam-gejamen kita lit nipi gulut si erbahanca lanai tenang perukurenta. E maka adi si perdiatoken nai nari lit nge buku 'tafsir nipi' janah teptep budaya lit nge si mesikel kal ngoge nipi rikut pe ngoge nasib. Bagenda me i bas kerajan Babil paksa e, raja Nebukadneser ernipi. Gulut ukurna nandangi nipina e sabap la iantusina kai nipina e ras kai ka ertina. E maka, itenahkenna kerina penasehat kerajan, guru-guru singoge nasib, guru permangmang, guru si baso, ras ahli perbintangan guna nuriken antusen nipina enda, tapi sada pe la ngasup nurikenca.

Kenca kerina gagal nuriken antusen nipi e, ngadap me Daniel siigelari Belsasar, man bana ituriken raja mulihi kai si jadi nipina. Kerna sada batang kayu galang i tengah doni, reh belinna, seh ku langit, bulungna mbur, buahna meramis banci i je cio kerina rubia-rubia. Tapi lit malekat nusur i surga nari ermomo guna nabah batang kayu e, la saja bulung ras batangna itabah tapi pe rubia-rubia e igera kerina. Pediat tongkohna janah iiket alu besi ras tembaga i tengah mbal-mbal. Pitu tahun perukurena lanai bagi perukuren jelma tapi perukuren rubia-rubia. Dungna pengakunna maka Dibata si meganjangna erkuasa, ngasup mereken kai pe man ise atena berena. Janah tek raja maka Daniel ngasup nuriken antusen nipi e sabap i bas ia lit kesah Dibata Si Badia.

Sekalak si idemi kuasa kesah Dibata, meteh kai sura-sura Dibata si man pesehen man raja. Kalak si pemetehna ngenca iandalkenna, la ngasup nuriken sura-sura Tuhan. Bage me kalak si erkiniteken, tetap erpersukuten man Tuhan gelah sieteh sura-suraNa si man pesehen man kerina jelma.